

Siunnersuut: Oqaatsinut politikki pillugu Inatsisartut inatsisaat**Kapitali 1***Siunertaq nassuiaatitaalu*

§ 1. Inatsisartut inatsisaanni siunertarineqarpoq nunap matuma oqaatsinut politikianut sinaakkutissat erseqqissut qularnaassallugit, tamatumunnga ilagitillugu oqaatsitigut akuunerulersitsineq, makku aqutigalugit

- 1) kalaallit oqaasiisa oqaatsit tamakkiisutut inuiaqatigiinnilu atugaasutut qularnaarnerisigut,
- 2) kalaallit oqaasiisa taakkualu ilitsoqqussaralugu oqaatsit allamiutullu oqaatsit ineriartornerisa nukittorsarnerisigut,
- 3) oqaatsitigut aporfusartut pinaveersarnerisigut peerniarnerisigullu, tamatumuuna marlunnik arlalinnillu oqaaseqarneq nukittoqutaallunilu pisuussutinngoqqullugu, aamma
- 4) Kalaallit Nunaat nalunngisaqarfiusumik inuiaqatigiiffittut nukittorsarniarlugu oqaasertusarnerup inuiaqatigiinni siuarsarneratigut.

§ 2. Oqaatsitigut akuunerulernissaq inunntut immikkoortunut pingasunut sammitinneqarpoq

- 1) kalaallisut ilikkarnissamik pisariaqartitsisunut,
- 2) danskisut tuluttulluunniit ilinniarnissamik pisariaqartitsisunut,
- 3) kalaallit kulturiannik, oqaluttuarisaanerannik inuiaqatigiinnilu pissutsinik ilinniartinneqarnissamik pisariaqartitsisunut.

Imm. 2. Oqaatsitigut akuunerulernissamik oqarneq paasineqassaaq pineqartuni taakkunani pingasuni oqaatsitigut aporfusartut peerniarnissaat inunntullu imm. 1-imi taaneqartunut oqaasertusaanissap nukittorsarnissaa, innuttaasut inuiaqatigiinni peqataasinnaanerat pitsanngorsarniarlugu nunatsinnilu ataatsimoornermik misigisimaneq kinaassuserlu patajaallisarniarlugit.

Kapitali 2*Oqaatsinut politikki*

§ 3. Kalaallit oqaasii tassaapput Kalaallit Nunaanni pisortatigoortumik oqaasiusut pisortatigullu ingerlatsinermi atugaasut.

Imm. 2. Kalaallit oqaasii sumiorpaluutinik pingaarnernik pingasunik pinnguuteqarput. Sumiorpaluutit Avanersuarimi, Tunumi aamma Kitaani atorneqartut.

Imm. 3. Danskisut oqaasii pisortatigut ingerlatsinermi atorneqarsinnaapput.

Imm. 4. Tuluit oqaasii allamiullu oqaasii allat pisariaqartitsineq malillugu atorneqarsinnaapput.

§ 4. Namminersorlutik ingerlatsisut minnerpaamik 10-nik sulisullit, aamma pisortat ingerlatsivii pisortatullu oqartussaasut oqaatsinut politikkimik ilusiliissapput.

Imm. 2. Oqaatsinut politikkimini imaritinneqarsinnaapput

- 1) pisortatut oqartussaaffiup imaluunniit suliffeqarfiup oqaatsitigut piginnaaffiinik erseqqissaaneq,
- 2) allamiut oqaasiinut kulturikkullu piginnaaffinnik ersersitsineq,
- 3) pisortatut oqartussaaffiup imaluunniit suliffeqarfiup avataanit oqaatsitigut isigineqarnerata ersersinnera,
- 4) suliffiup iluani avammullu attaveqatigiinnermi najoqqutassiat, aamma
- 5) sulisut piginnaasassaannut anguniakkat.

Imm. 3. Sulisitsisoq pisussaavoq sulisuminik immikkut pineqartumuinnaq oqaloqatiginnissalluni sulisup oqaatsinik aamma kalaallit kulturiannik, oqaluttuarisaanermik inuiaqatigiinnilu pissutsinik ilinniartitaanissamut pisariaqartitsinersoq.

Kapitali 3

Oqaasertusarneq

§ 5. Kalaallit Nunaanni najugaqavissut tamarmik pisinnaatitaapput kalaallisut danskisullu, kiisalu nunani tamalaani oqaatsinik atugaasunik ilikkarnissamut, oqalunnikkut allannikkullu, tassuunakkut inuiaqatigiinni inuunermut peqataasinnaaqullugit ilitsoqqussaralugulu oqaatsiminnik atuisinnaallutillu ineriartortitsisinnaaqullugit.

Imm. 2. Naalackersuisut tamanna pillugu isumasioqatigeereernikkut suliffeqarfimmi kattuffiit susassaqtullu attuumassutillit allat peqatigalugit pisinnaatitaanerup imm. 1-imi taaneqartup piviusunngortinneqarnissaanut malittarisassiorsinnaapput, tassunga ilanngullugit pikkorisartitsinermik atuartitsinermillu neqeroorutit taakkunungalu peqataanissamut kiffaangissuseqarneq pillugit.

Kapitali 4

Nakkutilliineq, kinguneqartitsinerit naammagittaalliuutillu

§ 6. Naalackersuisut suliffeqarfiit oqartussaasullu inatsimmik malinninnerannik nakkutilliissapput. Naalackersuisut nakkutilliineq Namminersorlutik Oqartussani oqartussaasunut sullissiveqarfinnullu allanut tunniussinnaavaa.

Imm. 2. Suliffeqarfiit namminersortut, pisortani oqartussaasut sullissiveqarfiillu § 4-mi taaneqartut nakkutilliisoqarfimmit qinnuigineqarnermikkut suliffeqarfiup, oqartussaasut sullissiveqarfiulluunniit oqaatsinut politikianik nassiussissapput, kiisalu oqaloqatigiinnerit § 4, imm. 3-mi pineqartut pisimanerinet uppersarsaallutik. Nakkutilliisoqarfik suliffeqarfinni namminersortuni, pisortani oqartussaasuni sullissiveqarfinnilu § 4-mi taaneqartuni aamma paasissutissanik nakkutilliisussaataitaanerup isumagineqarnissaanut pisariaqartunik pissarsisinnaapput.

Imm. 3. Inatsisartut suliffeqarfii nakkutilliisussaataitaangillat.

§ 7. § 4, imm. 1-imi aamma 3-mik unioqqutitsineq akiliisitaassutigineqarsinnaavoq.

Imm. 2. Pisussaaffinnik § 6, imm. 2-mi taaneqartunik malinninnginneq akiliisitaassutigineqarsinnaavoq.

§ 8. § 4, imm. 1 naapertorlugu oqaatsinut politikiliorsimanginneq, kiisalu § 4, imm. 3-mi taaneqartutut oqaloqatigiissimanginneq pillugit naammagittaalliuutit nakkutilliisoqarfimmut tunniunneqarsinnaapput.

Kapitali 5

Atuutilersitsineq ikaarsaariarnermilu aalajangersakkat

§ 9. Inatsisartut inatsisaat atuutilerpoq 1. januar 2010-mi.

Imm. 2. Oqaatsinut politikki suliffeqarfinni ataasiakkaani, § 4, imm. 1 naapertorlugu kingusinnerpaamik 1. april 2010-mi suliarineqareersimassaaq.

Namminersorlutik Oqartussat, ulloq xx, xx 2009

Kuupik Kleist

/

Mimi Karlsen